

Asociacion di Colombia :

Ta regala Aruba un monumento di figura di un homber birando un condor, simbolo di Sur America

STA. CRUZ—Asociacion di Colombia a manda traha un monumento masha grandi di un figura di un homber cu ta birando un condor. Esaki ta e intencion di e asociacion Colombiano aki na Aruba pa gradicimento pa e lazonan di amistad entre e dos nacionnan aki. Dia 20 di Juni lo ta e fecha di independencia di Colombia y riba e fecha aki e asociacion tin planea di keda cla pa haci develo oficial di e monumento aki. E sitio unda lo ubica e monumento lo ta riba e mesun Plaza unda actualmente Simon Bolivar su monumento ta situa, riba e Plaza Bolivar. Actualmente e asociacion lo bay laga traha un base pa e monumento, cu alrededor di dje

lo bin un lugar pa mata. E midi di e monumento ta di 2.30 y 2.50 meter.

E monumento di e homber cu ta bira condor a wordo escogi especialmente pa motibo cu e condor ta e simbolo comun di Sur America, unda cu condor ta frecuente y ta bula liber riba e continente aki. Sr. Hendrick Croes cu ta un di e personanan tras di e proyecto aki a elabora cu e monumento aki mes a costa 2456 dollar na Colombia y aki tambe mester a paga un capital pa por a saca e monumento for di waf, ademas di su transporte.. Esaki ta un deseo di masha hopi tempo di e asociacion di amigos de Colombia pa duna Aruba

un regalo pa tur local Aruba significa pa nan. E asociacion di Colombia cu ta traha na beneficio comunitario, lo bay tin 11 diferente actividad e aña aki, den cual hopi di e eventona aki lo ta pa recauda fondo pa yuda nan mesun miembronan.

E miembronan mes no necesariamente mester ta Colombiano, simplemente bo mester ta amigo di Colombia pa asina bo bin na remarca pa e ayudo social cu nan ta ofrece. Nan tin actividad cultural y tambe otro programa cu ta na bienestar di nan miembronan, manera les di computer of les con pa maneha empresanan chikito etc. Pa e dia mes oficial di e develo y entregamento di e monumento, lo bay tin un acto protocolario prome unda cu gobernador di Aruba lo bay ta presente. Tambe nos minister presidente tambe lo hiba palabra, cu presencia di otro dignatarios. Despues lo sigui otro actividadnan cultural, manera aña pasa a tene na Piedra Plat Entertainment Center. E aña aki e asociacion ta priminti di lo haci e actividad aki mucho mas grandi.

